

26/05/1997

Malam Seniman Ogos depan

PERSATUAN Seniman Malaysia (Seniman) berterima kasih kepada Perdana Menteri, Datuk Seri Dr Mahathir Mohamad kerana kesudiannya menghadiri Malam Seniman ke-23 yang diadakan di sebuah hotel terkemuka di Bandar Sunway, pada 3 Ogos depan.

Presidennya, Datuk Ismail Hutson berkata kesudian Perdana Menteri itu dianggap sebagai mencerminkan keprihatinan pemimpin negara terhadap karyawan tanah air.

Menurutnya, kesudian Perdana Menteri itu juga adalah sebagai tanda pengiktirafan beliau terhadap artis sebagai salah satu aset negara. Ia juga memberi semangat dan galakan kepada artis untuk teruskan perjuangan dalam kerjaya masing-masing.

"Saya sudah dimaklumkan mengenai kesudian Perdana Menteri untuk datang ke Malam Seniman ke-23, nanti, walaupun ia masih tertakluk kepada keadaan di mana beliau tidak menghadapi sebarang urusan yang lebih penting pada tarikh itu.

"Tapi saya yakin, Perdana Menteri tidak menghampakan kita. Malah beliau sudah memberikan kata-kata aluan untuk dimuatkan dalam buku cenderahati," katanya di sidang akhbar Seniman di Finas, Hulu Klang, kelmarin.

Sebelum itu, Menteri Kebudayaan, Kesenian dan Pelancongan, Datuk Sabbaruddin Chik mengesahkan untuk menjadi penaung pada Malam Seniman ke-23 itu.

Ismail berkata banyak syarikat besar dan tokoh korporat memberi sokongan kepada artis apabila mereka sudah membeli sebahagian daripada 250 meja yang dijual pada malam itu.

"Kalau diikutkan jumlah penjualan meja memang kurang menggalakkan. Sehingga kini 40 peratus meja sudah dijual.

"Sebenarnya selain pihak korporat, semua meja dijual pada individu berminat. Dan saya berharap ia dapat dijual semua menjelang tarikh majlis ini diadakan," jelasnya.

Malam Seniman ke-23 diadakan dengan tujuan utama mengisi tabung persatuan sejajar dengan visi AJK Seniman baru bagi mengukuhkan kedudukan kewangan persatuan.

Menurut Ismail, apabila dana kewangan Seniman kukuh, barulah persatuan boleh merancang kegiatan yang ada kepentingan dengan ahli selain dapat membantu ahli yang memerlukan.

(END)